

Dr. Elvis Fejzić, vanredni profesor, predsjednik

Dr. Elmir Sadiković, vanredni profesor, član

Dr. Šaćir Filandra, redovni profesor, član

Sarajevo, 07. 12. 2020. godine

## **VIJEĆU FAKULTETA POLITIČKIH NAUKA UNIVERZITETA U SARAJEVU**

Na osnovu člana 59. tačka m) Statuta Univerziteta u Sarajevu, a u vezi sa članovima 36. i 37. Pravila studiranja za treći ciklus studija na Univerzitetu u Sarajevu, Senat je na 21. elektronskoj sjednici održanoj 26. 11. 2020. godine, donio Odluku o obrazovanju Komisije za ocjenu uslova kandidata Jasmina Musića, MA i podobnosti teme doktorske disertacije pod naslovom „POLITIČKE IMPLIKACIJE LIBERTANSKE POLITIKE U BOSNI I HERCEGOVINI IZMEĐU DVA SVJETSKA RATA“, u slijedećem sastavu: dr. Elvis Fejzić, vanredni profesor, predsjednik; dr. Elmir Sadiković, vanredni profesor, član; i dr. Šaćir Filandra, redovni profesor, član.

Nakon što je Komisija proučila dostavljenu prijavu doktorske disertacije kandidata, podnosi Vijeću Fakulteta slijedeći:

# IZVJEŠTAJ

## 1. Ocjena uslova kandidata

Jasmin Musić rođen je 10. marta 1992. godine u Prijedoru. Osnovnu školu i gimnaziju završio je u Ključu. Diplomirao je 2013., a magistrirao 2015. godine na Fakultetu političkih nauka Univerziteta u Sarajevu, na Odsjeku za politologiju. Po završetku prvog i drugog ciklusa studija nagrađen je Poveljom Univerziteta u Sarajevu za najboljeg studenta Fakulteta političkih nauka. Magistarski rad odbranio je na temu: „Neoliberalizam i savremena država“. U toku 2017. godine upisao je doktorski studij na Fakultetu političkih nauka Univerziteta u Sarajevu.

Tokom prva dva ciklusa studija stipendiran je od strane Općine Ključ, Ministarstva za pitanja boraca i RVI Unsko-sanskog kantona i Fondacije Konrad Adenauer (KAS). Završio je jednogodišnji program Političke akademije SDA i Političku školu Vijeća Evrope, a sudjelovao je na većem broju tematskih konferencija koje su tretirale omladinski aktivizam, studentska prava i saradnju studenata političkih nauka u Bosni i Hercegovini.

Već duži niz godina aktivan je u političkom životu Unsko-sanskog kantona: od 2015. do kraja 2018. godine bio je angažiran u svojstvu savjetnika premijera Unsko-sanskog kantona, a na Općim izborima 2018. godine izabran je u Skupštinu Unsko-sanskog kantona, gdje je preuzeo dužnost predsjednika svog poslaničkog kluba.

Na osnovu prethodno iznesenih činjenica, Komisija je mišljenja da kandidat Jasmin Musić, MA ispunjava uslove za izradu predložene doktorske disertacije.

## 2. Ocjena podobnosti teme doktorske disertacije

### a. Problemsko područje

Period između dva svjetska rata u političkoj historiji Bosne i Hercegovine može se označiti dinamičnim, pluriverzičnim i kompliciranim, sa političkog aspekta, pa čak i egzistencijalnim kada je u pitanju očuvanje teritorijalnog integriteta i političkog kontinuiteta, odnosno temeljnih atribucija bosanskohercegovačke državnosti. U tom vremenu desile su se krupne promjene u društvenom, ekonomskom i političkom kontekstu, koje su snažno uticale na političke procese u Bosni i Hercegovini. U tom smislu, prije svega se misli na agrarnu reformu, formiranje jugoslavenske monarhističke države, pojavu aktera koji promoviraju ideju bosanske autonomije, ekspanziju nacifašističkih panpolitika i teritorijalnog nacionalizma, ali i svjetsku ekonomsku krizu čije su se posljedice osjetile i u tadašnjoj Bosni i Hercegovini. Apostrofirana događanja na unutardržavnom i izvandržavnom planu uticala su na buduća politička kretanja u bosanskohercegovačkom društvu, ali i na tadašnji politička zbivanja, zbog čega istraživanje i izučavanje ovog perioda političke vladavine ima izražen društveno-politički i naučni značaj.

U istraživanju bit će posebno problematizirano i politički valorizirano javno djelovanje i naučni aktivitet aktera libertanske, emancipatorske, slobodarske i progresivne politike u Bosni i Hercegovini između dva svjetska rata, što se može sagledavati kroz studentski aktivizam, djelatnost političkih partija, sindikalnih organizacija i intelektualne elite, a bit će analizirane i posljedice tog aktiviteta. Ideje, elemente i teme libertanske politike, koja ima izražen emancipatorski i državotvorni karakter, moguće je detektirati i identificirati u političkoj agendi i javnom aktivitetu tadašnje probosanske konzervativne politike i progresivne ljevičarsko-marksističke politike, za koju se vezuje i djelatnost sindikalno-radničkih organizacija. Uprkos ideološko-političkim razlikama u percepciji određenih socijalnih pitanja (npr. agrarne reforme), oba aktera libertanske i emancipatorske politike stoje na pozicijama odbrane integriteta države Bosne i Hercegovine od prijetnji panpolitičkih projekata, razvoja potencijala demokratske politike i političke borbe za dostojanstven život bosanskohercegovačkog stanovništva. Upravo akcentirano konvergentno djelovanje tadašnjih ljevičarskih i desničarskih političkih elita spram panpolitičkih i antibosanskih projekata politike aktuelizira ovu temu u savremenom bosanskohercegovačkom političkom diskursu. Stoga, u disertaciji će naglasak biti stavljen upravo na identificiranje potreba i mogućnosti koegzistentnog političkog djelovanja u sferi praktične politike, kao odgovora na brojne savremene izazove države Bosne

i Hercegovine. Prema tome, problem doktorskog istraživanja korespondira sa detektiranjem, identificiranjem i valoriziranjem emancipatorskih odrednica u aktivitetu konzervativnih i sindikalno-marksističkih elita u bosanskohercegovačkoj politici između dva svjetska rata.

### **b. Istraživačko pitanje i hipoteze istraživanja**

Na osnovu identificiranog problema istraživanja moguće je formulirati i odrediti predmet istraživanja ili krucijalno pitanje na koje doktorska disertacija ima za cilj dati odgovor, a koje se u najsublimiranijem obliku može odrediti na slijedeći način: predmet istraživanja, u širem smislu, bit će fokusiran na analizu pluralističkog, slobodarskog i demokratskog potencijala navedenih političkih aktera i njihov odnos prema pitanju narodnog suvereniteta, nacionalne ravnopravnosti, politike multikulturalizma i koncepcijskog projekta bosanske autonomije.

Iz definiranog problema i predmeta istraživanja proizilaze i hipoteze koje će tokom pisanja i rada na doktorskoj disertaciji biti ispitane.

Generalna hipoteza glasi:

Društveno-politički aktivitet libertanskih političkih aktera u međuratnoj Bosni i Hercegovini rezultirao je pozitivnim političkim implikacijama, koje se ogledaju u razvoju demokratskog potencijala bosanskohercegovačkog društva, demaskiranju i prepoznavanju ekspanzionističkih ciljeva pansrbizma i pankroatizma, afirmaciji ideje bosanske autonomije i promoviranju multikulturalne Bosne i Hercegovine.

Posebne hipoteze glase:

- Nasuprot zvaničnom ustavno-političkom poretku koji je politička, vjerska i ekonomska prava stavljao u drugi plan, u Bosni i Hercegovini su se, u međuratnom periodu, razvile libertanske ideje afirmirane kroz javni aktivitet emancipatorski orijentiranih pojedinaca, a u cilju zaštite slobode, međuetničke koegzistencije, privatnog vlasništva, pravne jednakosti i prava na nacionalno samoopredjeljenje.
- Politički centralizam, kamuflirani monarhizam i protudemokratsko političko ponašanje u prvoj jugoslavenskoj državi reducirali su društveni i demokratski potencijal državne vlasti.
- Intencija za nacionalnom unitarizacijom prve jugoslavenske države motivirala je nastanak i razvoj decentralističkih političkih tendencija u Bosni i Hercegovini.

- Divergentnost u percepciji etničkih i ekonomskih pitanja presudno je uticala na razvoj političkog pluralizma u Bosni i Hercegovini između dva svjetska rata
- Interakcija između Komunističke partije Jugoslavije i sindikalnih organizacija uticala je na tadašnji politički proces, a posebno u oblasti tretiranja radničkih prava.
- Društveni i ekonomski stavovi probosanske političke desnice artikulirali su se pretežno kroz aktivitet nacionalno trezvene i politički osviještene elite, koja nije bila spremna na kompromise sa akterima panpolitike, unutar Jugoslavenske muslimanske organizacije, a njihovi ciljevi su: zaštita teritorijalne cjelovitosti Bosne i Hercegovine, zalaganje za pravedno rješenje agrarnog pitanja, vakufsko-mearifska autonomija, osiguravanje lične i imovinske sigurnosti muslimanskog stanovništva, njegovanje aksiologije multikulturalizma, suživota i tolerancije.
- Ideje progresivne bosanske ljevice refleksija su djelovanja napredne studentske omladine, komunističkog pokreta i sindikalnih organizacija.
- Kao integrirajući politički odgovor libertanskih političkih snaga na panpolitičke projekte, centralističke tendencije i monarhizam oblikovana je ideja bosanske autonomije.

### **c. Metodološki pristup**

Pristup istraživanju političkih implikacija libertanske politike u međuratnoj Bosni i Hercegovini je dominantno politološki uz povremenu upotrebu i uvođenje historijske metode i sociološke analize u teorijskoj elaboraciji. U tom smislu, tokom izrade doktorske disertacije bit će korištene sljedeće metode: historijska metoda – za cilj ima jasnije i potpunije spoznati historijsko mjesto proučavane pojave ili predmeta, preciznije odrediti njegovu ulogu i odgovarajuće specifičnosti; komparativna metoda – u širem smislu je koncept upoređivanja koji se može objasniti kao umna logička aktivnost koja se javlja u mnogim situacijama svakodnevnog života, sastoji se u promatranju sličnosti ili razlika dvije ili više stvari ili pojava, dok u užem smislu podrazumijeva sistematski postupak kojim se proučavaju odnosi, sličnosti i razlike između dva predmeta ili pojave sa ciljem da se izvedu određeni zaključci; metoda analize sadržaja – podrazumijeva metodu koja u društvenim naukama služi za proučavanje sadržaja komunikacije. U slučaju ovog istraživanja, akcent će pretežno biti stavljen na naučne sadržaje i političke dokumente tematski povezane sa istraživanim periodom i temom istraživanja.

Važni indikatori za provjeru prethodno definiranih hipoteza su: rezultati provedenih izbora u međuratnoj Bosni i Hercegovini i aktivitet izabrane vlasti u političkim institucijama; statistički podaci o broju zaposlenih i pismenih stanovnika Bosne i Hercegovine u istraživanom periodu; podaci o iseljavanju iz Bosne i Hercegovine u periodu između dva svjetska rata; dokumentirane posljedice centralističko-unitarnog upravljanja Kraljevinom Jugoslavijom na Bosnu i Hercegovinu i političko organizovanje na njenom prostoru; i arhivirani zapisi i odjeci panpolitičkih dogovora koji se reflektiraju na nacionalnu teritoriju Bosne i Hercegovine. Navedeni indikatori ukazuju na neophodnost primjene operativne metode analize (sadržaja) dokumenata, pri čemu će biti primijenjena prvenstveno kvalitativna analiza.

#### **d. Ciljevi istraživanja**

Primarni naučni cilj u doktorskom istraživanju je identificirati sve pojavne oblike političkog djelovanja libertanskih društvenih snaga u međuratnoj Bosni i Hercegovini, detektirati njihov odnos prema socijalnim i ekonomskim pitanjima, odrediti i definirati njihov stav prema međunarodnim političkim kretanjima, u prvom redu prema pojavi nacifašizma u Njemačkoj i Italiji, kao i ispitati njihov odnos prema panpolitičkim projektima pansrbizma i pankroatizma. Uz navedeno, poseban akcent stavljen je na detektiranje emancipatorskog i pacifističkog diskursa te ukazivanje na politički značaj konvergentnog djelovanja konzervativnih i ljevičarskih libertanskih grupa oko pitanja od esencijalne važnosti za očuvanje Bosne i Hercegovine i biološki opstanak njenog stanovništva. Sintetički cilj istraživanja je dokazati da je libertanska politika u Bosni i Hercegovini između dva svjetska rata producirala pozitivne političke implikacije, koje su dugoročno osigurale temelje političke borbe za teritorijalnu cjelovitost i nezavisnost Bosne i Hercegovine. Za ostvarivanje naučnih ciljeva od koristi će biti brojna naučno verificirana znanja i studije iz ovog perioda, što će pored kvalitetnog uvida osigurati i multidisciplinarni pristup u istraživanju.

Saznanja koja će biti prikupljena u istraživanju atribucija libertanske politike u međuratnom periodu u Bosni i Hercegovini imat će veliki značaj za savremenu bosanskohercegovačku političku misao, ali i političke rasprave u sferi praktične politike oko restrukturiranja države. Afirmiranje ideje konvergentnog političkog djelovanja emancipatorskih snaga u tranzicijskoj zemlji kakva je Bosna i Hercegovina, uz sve izazove koji slijede, može biti od presudne važnosti za iniciranje i realiziranje nužnih političkih promjena. Zbog toga ovo doktorsko istraživanje bit će korisno i značajno, kako za akademsku zajednicu, tako i za političke

institucije, civilno-društvene asocijacije, ali i za političke stranke koje preferiraju i promoviraju libertansko-emancipatorske atribucije.

#### **e. Teorijski okvir i pregled literature**

Istraživanje na temu „Političke implikacije libertanske politike u Bosni i Hercegovini između dva svjetska rata“ ima za cilj detektovati, analizirati i sublimirati pojavne oblike napredne, progresivne, slobodarske, emancipatorske i libertanske političke misli i praktičnog aktiviteta u Bosni i Hercegovini u periodu između dva svjetska rata. Primarna istraživačka intencija korespondira sa pronalaženjem, identificiranjem i valoriziranjem vrijednosti apostrofiranog političkog pristupa unutar ljevičarskog i desničarskog političkog aktiviteta, ali i javnog djelovanja nezavisnih intelektualaca tog vremena, a potrebno je, uz to, i kontekstualizirati djelatnost libertanskih političkih elita i demaskirati njen odnos prema nacifašizmu, ekspanzivnoj panpolitici, progresivnim zahtjevima radničkog pokreta i tadašnjem političkom statusu Bosne i Hercegovine.

U dijelu doktorske disertacije, koji obuhvata teorijsku osnovu istraživanja, bit će prezentirana različita teorijska poimanja države u politologiji, atribucije libertanske politike i obilježja demokratskog režima vlasti, što čini okvir političkog djelovanja zagovornika i aktere tadašnje proliberatske političke vizije u Bosni i Hercegovini. Teorijska saznanja slijedećih autora, koji su se bavili spomenutim temama, istraživali akcentirana pitanja i politološke pojmove, bit će korištena u pisanju ovog dijela doktorske disertacije:; Badnjević, 1938; Behmen, 1920; Bijedić, 1967; Čolaković, 1937; Ćišić, 1919; Dizdarević, 1937; Held, 1997; Isensee, 2004; Korjenić, 1937; Kurtović, 1919; Prelot, 2002; Šulce, 2002; Vinsent, 2009; Zgodić, 2015.

Za kritičku analizu političkog statusa i društvenih prilika u Bosni i Hercegovini unutar prve jugoslavenske države te detektiranje obilježja političkog pluralizma i istraživanje uticaja sindikata na tadašnju praktičnu politiku bit će konsultirani i korišteni radovi sljedećih autora: Behmen, 1920; Begić, 1966; Ćorović, 1933; Defterdarević, 1939; Dučić, 1990; Đaković, 1980; Ekmečić, 1989; Hadžibegović, 1981; Jelavich, 1992; Korkut, 1918; Krulj, 1928; Kikić, 1937; Badnjević, 1938; Begović, 1938; Imamović, 2014; Kecmanović, 1952; Purivatra, 1977; Seferović, 1960; Šehić, 1991; Truhelka, 1918.

Dio doktorske disertacije u kojem se istražuje politički aktivitet konzervativne političke elite, koja je u to vrijeme javno promovirala emancipatorsku politiku, zalagala se za

multikulturalizam i protekciju političkog subjektiviteta Bosne i Hercegovine bit će istraživani i analizirani prema: Ćišić, 1919; Ćišić, 1920; Ćišić, 1991; Bašagić, 1931; Begović, 1938; Begović, 1976; Ćemerlić, 1965; Filandra, 1998; Filipović, 1980; Hauptmann, 1967; Humo, 1970; Išek, 1991; Jahić, 2017; Ljubunčić, 1923; Kreševljaković, 1991; Juzbašić, 1999; Purivatra 1970; Redžić, 2000; Spaho, 1938; .

U dijelu doktorskog istraživanja koje se odnosi na aktivitet progresivne bosanskohercegovačke ljevice, njene ideološke i emancipatorske preferencije i viđenje političkog statusa Bosne i Hercegovine spoznajno produktivna su djela i radovi slijedećih autora: Badnjević, 1938; Behmen, 1922; Bijedić, 1967; Bulbulović, 1939; Čolaković, 1945; Čubrilović, 1930; Ćišić (Husref), 1938; Filipović, 1986; Humo, 1946; Humo, 1970; Karabegović, 1973; Karabegović, 1979; Kecmanović, 1952; Kikić, 1928; Kikić, 1937; Korjenić, 1937; Krupić, 1937; Kulenović, 1938; Grbić, 1935; Muminović, 1982; Muftić, 2002; Seferović, 1980;

Dio doktorske disertacije u kojem će se kritički analizirati i istraživati panpolitika kao prijetnja demokratskoj i libertanskoj politici bit će zasnovan, u pogledu istraživanja, na spoznajnim uvidima iz slijedećih bibliografskih izvora: Boban, 1974; Ćišić, 1920; Ćorović, 1989; Dizdarević, 1936; Handžić, 1940; Krulj, 1920; Krulj, 1925; Mulalić, 1936; Pilar, 1918; Pilar, 1927; Šarac, 1981; Šahinović, 1939; Zgodić, 2000; Zgodić, 2012.

O ideji i politici bosanske autonomije te dometima demokratske politike u međuratnoj Bosni i Hercegovini istraživali su i pisali slijedeći autori, čiji će spoznajni uvidi i studije biti korištene u pisanju ovog dijela doktorskog istraživanja: Banac, 1995; Bašagić, 1931; Begić, 1966; Ćišić, 1919; Ćišić, 1991; Defterdarević, 1939; Hadžić, 1925; Humo, 1970; Išek, 1991; Korkut, 1918; Ljubunčić, 1937; Masleša, 1945; Purivatra, 1977; Redžić, 1983; Sarajlić, 1933; Šehić, 1980; Zgodić, 2008.

U preliminarnom spisku korištene literature kandidat je naveo 153 bibliografske jedinice širokog disciplinarnog spektra, što predstavlja relevantnu građu za doktorsko istraživanje.

#### **f. Obrazloženje strukture istraživanja**

Rezultati istraživanja na temu „Političke implikacije libertanske politike u Bosni i Hercegovini između dva svjetska rata“ bit će prezentirani kroz sedam poglavlja (dijelova) doktorske disertacije, uz uvod i zaključna razmatranja. Uvod će dati osnovne naznake o predmetu istraživanja, te ukazati na motive za istraživanje. U prvom poglavlju pod naslovom



„Metodološko-koncepcijski pristup istraživanju“ utvrdit će se i prezentirati metodološki okvir istraživanja. U cilju stvaranja teorijskih temelja istraživanja, što će biti realizirano u drugom poglavlju, potrebno je naučno elaborirati i kritički prezentirati esencijalne atribucije i određenja libertanske politike. Pored toga, važno je prezentirati i istražiti različita teorijska poimanja države i demokratije u politologiji, što će omogućiti jednostavnije razumijevanje formatiranja i djelovanja libertanskih politika u tadašnjim okolnostima. U nastavku rada, odnosno u trećem poglavlju, bit će određen i istražen politički, vremenski i socijalni kontekst istraživanja, pri čemu će biti definiran i kritički prezentiran specifični ustavno-pravni položaj Bosne i Hercegovine u prvoj jugoslavenskoj državi, zatim socijalno i ekonomsko stanje bosanskohercegovačkih radnika, osnove političkog organiziranja u periodu između dva svjetska rata u BiH, kao i metode sindikalnog organiziranja, djelovanja i uticaja na donošenje političkih odluka. Upravo je politički status Bosne i Hercegovine u Kraljevini Jugoslaviji bio jedan od ključnih motiva u nastanku i razvoju libertanskih politika, koje su u fokusu ovog doktorskog istraživanja. S ciljem razumijevanja tadašnjeg ustavnopravnog poretka, biće šire elaboriran značaj i normativna dimenzija Vidovdanskog ustava, kao i izbora za Ustavotvornu skupštinu koji su prethodili njegovom usvajanju. Kako je političko organiziranje, a samim tim i kadrovska implementacija koalicionih dogovora bila pretežno temeljena na vjerskoj i nacionalnoj osnovi, progresivna ljevica je zbog svojih političkih stajališta bila osuđena na vaninstitucionalni aktivitet, sferu sindikalnog djelovanja i stvaranje političkih mreža među tadašnjom progresivnom intelektualnom elitom. Prema tome, politički odnosi u Bosni i Hercegovini u periodu između dva svjetska rata utemeljeni su na političkoj i stranačkoj heterogenosti, što je posljedica različitih i isključivih pogleda na političko-ekonomske probleme zemlje, ali i složenu etničku i vjersku strukturu.

U pogledu tematskog okvira četvrto i peto poglavlje se najviše fokusiraju na predmet istraživanja. Nakon teorijskog određenja libertanske i emancipatorske politike, u ovim poglavljima bit će identificirani akteri konzervativne i ljevičarske politike u BiH između dva svjetska rata, a bit će, uz to, istraženi modaliteti njihovog probosanskog, slobodarskog i emancipatorskog političkog promišljanja i djelovanja. Naime, u ovim poglavljima bit će istražen i rekonstruiran ideološki profil aktera libertanske politike, njihovi odnosi sa socijalnim grupama, poimanje ekspanzivnog centralizma i političke vizije Bosne i Hercegovine u budućnosti. Analitički prikaz djelovanja konzervativnih snaga biće ostvaren kroz politološki osvrt na političko djelovanje Jugoslavenske muslimanske organizacije, način agitacije njenog rukovodstva, odnos sa Islamskom vjerskom zajednicom, učešće veleposjednika u kreiranju i

provođenju njenih politika i partijske rezultate na izborima u međuratnom periodu. Pored političke agende Jugoslavenske muslimanske organizacije, u ovom segmentu istraživanja bit će detaljno propitana i istražena politička uloga Mehmeda Spahe i Huseina Ćišića, kao ključnih političkih ličnosti u bošnjačko-muslimanskoj politici u periodu između dva svjetska rata u Bosni i Hercegovini. U kontekstu propitivanja i dijagnosticiranja stvarne društveno-političke uloge radničkog pokreta, istraživanje će obuhvatiti režimski teror u prvim poslijeratnim godinama nad ovim pokretom i posljedice na njegov razvoj u vremenu koje je uslijedilo. Političke agende i programi Socijalističke partije Jugoslavije i Komunističke partije Jugoslavije, kao partijske paradigme tadašnjeg ljevičarskog pokreta, bit će prezentirani kroz osvrt na njihovo formiranje, principe djelovanja i odnos prema nacionalnom pitanju, agrarnom pitanju i politici sekularizma. Ovdje je važno naglasiti da je proces diferencijacije u radničkom pokretu, u skladu sa međunarodnim kretanjima, zahvatio i Bosnu i Hercegovinu. Prije izbijanja prvog svjetskog rata jedna grupa socijalista okupljena oko lista „Zvono“ koju je predvodio Jovo Šmitran izdvojila se iz Socijaldemokratske stranke Bosne i Hercegovine. Jedan od ključnih razloga ovog raslojavanja bio je odnos prema nacionalnom pitanju, prema kojem su Zvonaši imali pozitivan stav, što je otvorilo vrata pojavi nacionalizma u radničkom pokretu. Prije temeljne analize koja će u radu uslijediti, već sada možemo konstatirati da je nesporno postojanje pojedinaca unutar JMO koji su odstupili od libertanskih političkih ciljeva i zbog toga ih razdvajamo od zdrave matice stranke. S druge strane, analizom praktičnog aktiviteta reformskih socijalista, moguće je zaključiti da ni oni ne pripadaju ljevičarskim akterima, koji su u ovom periodu otvoreno promovirali libertansku politiku. Za predmet istraživanja i našeg interesovanja od ključne važnosti je revolucionarno krilo tadašnje bosanskohercegovačke ljevice. Dakle, u ovim dijelovima disertacije bit će istražena i neslaganja unutar konzervativnih i ljevičarskih krugova, uticaj tih nesuglasica na praktično provođenje politike i njihove ishode.

Jedan od glavnih političkih projekata, kojem su se tada usprotivili akteri bosanskohercegovačke libertanske politike, bio je teritorijalni nacionalizam oblikovan kroz srpsku i hrvatsku panpolitiku. Tu će, s ciljem potpunog razumijevanja ovih projekata, biti prezentirana historijska pozadina, načini djelovanja i ciljevi panpolitičkih projekata koji su imali teritorijalne pretenzije prema Bosni i Hercegovini. U ovom, tj. šestom poglavlju bit će istražene i prezentirane prakse nacionaliziranja muslimanskog stanovništva, što je u panpolitičkim projekcijama bila važna stepenica u ostvarivanju ciljeva. U tom kontekstu, bit će spoznajno produktivan i politički prikaz uloge pojedinaca aktivnih u muslimanskom političkom životu, a koji su djelovali u skladu s ovim panpolitikama. Teritorijalni nacionalizam

kulminirao je s politikom nacifašizma u godinama pred Drugi svjetski rat, što će biti označeno kao ključna prijetnja emancipaciji i slobodi. Prema tome, motive teritorijalnog nacionalizma bit će neophodno istražiti kroz panpolitičke projekte usmjerene na nacionalnu teritoriju Bosne i Hercegovine. U sedmom poglavlju doktorske disertacije bit će sumirane i sistematizirane političke implikacije libertanske politike u Bosni i Hercegovini, njihova refleksija na poimanje demokratije, slobode, jednakosti i ravnopravnosti, s posebnim naglaskom na pojavu i razvoj idejno-političkog projekta bosanske autonomije. Uz obavezan prikaz historijskih činjenica, s politološkog aspekta, bit će kritički analiziran i prezentiran međunarodni kontekst, politički potencijal, otežavajuće unutardržavne okolnosti i motivi aktera borbe za bosansku autonomiju. U zaključnim razmatranjima bit će data kritička sinteza, prijedlozi i preporuke za nova istraživanja u ovoj oblasti. Pored navedenog, posljednja cjelina rada će sadržavati sistematiziran i koncizan pregled najvažnijih rezultata istraživanja, koji će zbirno dati odgovore na fundamentalna naučna pitanja o predmetu istraživanja – otvorena na osnovu uvida u postojeća naučna saznanja – što će ukazati na ispravnost postavljenih hipoteza u istraživanju. Pored osnovnih poglavlja, ova doktorska disertacija će sadržavati i pregled korištene literature, sažetak na bosanskom i engleskom jeziku, a, uz to, možda i tabele, grafikone i ilustracije u prilog istraživačkoj temi.

#### **g. Naučna i društvena opravdanost predložene teme doktorske disertacije**

Naučna opravdanost istraživanja utemeljena je na činjenici da politički kontekst međuratne Bosne i Hercegovine krasi i markiraju važni društveni, politički i ekonomski događaji, koji su uticali na oblikovanje političke kulture bosanskohercegovačkih građana. Kako se država Bosna i Hercegovina i u postdejtonskom periodu susreće sa političkim koncepcijama i politikama koje dovode u pitanju njenu teritorijalnu kompaktnost i, uz to, negiraju historijsko utemeljenje i mogućnost političke koegzistencije bosanskohercegovačkih naroda i građana, onda je naučna opravdanost ovog istraživanja itekako važna za istraživanje i proučavanje trenutne praktične politike.

Rezultati ovog istraživanja doprinijet će boljem razumijevanju političkih odnosa u prvoj jugoslavenskoj državi, ali i ekonomskih problema sa kojima su se tada suočavali bosanskohercegovački građani, u okolnostima kontingentnih rasprava oko rješavanja agrarnog pitanja i uslijed dinamičnog iseljavanja muslimanskog stanovništva. Politički efekti akcentiranih pitanja i tadašnjih loših političkih rješenja mogu se detektirati i danas u

političkom, ekonomskom, religijskom, demografskom i obrazovnom miljeu u Bosni i Hercegovini, pa je neupitna, imajući navedeno u vidu, društvena opravdanost ovog istraživanja.

### 3. Mišljenje i prijedlog komisije

Prijavljena doktorska disertacija „Političke implikacije libertanske politike u Bosni i Hercegovini između dva svjetska rata“ predstavlja znanstvenu novost i naučni iskorak u odnosu na dosadašnje parcijalne pristupe istraživanju apostrofiranog perioda političke historije i misli u Bosni i Hercegovini. Složenost i inovativnost pristupa istraživanju doprinijet će boljem i adekvatnijem razumijevanju političkih implikacija libertanske politike u međuratnoj Bosni i Hercegovini te time ispuniti prazninu u postojećem naučnom fondu, ali i pružiti osnovu za izvođenje zaključaka koji će biti od koristi za nova istraživanja u ovoj oblasti politologije. Prilikom razgovora sa Komisijom o radnom projektu doktorske disertacije te kroz samu konačnu prijavu disertacije, kandidat je pokazao da je savladao odgovarajuće metode naučno-istraživačkog rada, ali i da posjeduje sposobnost za kompleksno istraživanje od naučne i društvene relevantnosti i da je osposobljen za izvođenje relevantnih zaključaka.

Na temelju iznesenog, Komisija predlaže Vijeću Fakulteta političkih nauka Univerziteta u Sarajevu da pozitivno ocijeni uslove kandidata **Jasmina Musića, MA za izradu doktorske disertacije, a temu doktorske disertacije pod naslovom: „Političke implikacije libertanske politike u Bosni i Hercegovini između dva svjetska rata“ prihvati kao podobnu.**

Komisija za mentora doktorske disertacije predlaže prof. dr. Elvisa Fejziću.

#### KOMISIJA:

---

Dr. Elvis Fejzić, vanredni profesor, predsjednik

---

Dr. Elmir Sadiković, vanredni profesor, član

---

Dr. Šaćir Filandra, redovni profesor, član